



Här Fernand Etgen
President vun der Chamber

Lëtzebuerg, de 18. August 2021

Här President,

Esou ewéi den Artikel 81 vum Chambersreglement et virgesäit, bieden ech Iech, dës **drénglech Fro** un den Här Educatiounsminister an un d'Madamm Gesondheetsministesch weiderzeleeden.


An der Plenarsitzung vun der Chamber vum 15. Juli 2021 hat den Här Educatiounsminister a senger Replik op eng Motioun vun der CSV gesot, hie wéilt d'Mesuren, déi zur Schoulrentrée 2021/2022 ënner Berécksiichtegung vun der jeeweileger Covid-Situatioun eventuell en Place ze setze wieren, iwwer de Summer diskutéieren. Zweek Méint virdrun wier et ze fréi, fir kënnen ofzeschätzen, wéi d'Pandemie sech bis dohin entwéckelt hätt.

An an hirer Pressekonferenz vum 11. August sot d'Madamm Gesondheetsministesch, bei de Schüler tëscht 12 an 18 Joer wiere Schnelltester elo mol nach bis Allerhellege geplangt.

An deem Kontext wéilt ech folgend Froen un den Här Educatiounsminister an un d'Madamm Gesondheetsministesch stellen :

1. Wat ass den aktuelle Stand vun der Preparatioun vum de Mesure géint eng weider Verbreedung vum Covid-19-Virus fir d'Rentrée an de Schoulen?
2. A wéi wäit gëtt de sougenannte Stufemodell fir dës Rentrée ugepasst ?
3. Ass de Covid-Check-Regime fir d'Schouljoer 2021/2022 mat dräi Schnelltester pro Woch fir déi, déi net kënnen oder net wëlle geimpft ginn, geplangt ?
4. Wa jo, wéi preparéieren sech d'Regionaldirektiounen am Fondamental respektiv d'Lycéesdirektiounen am Secondaire drop ?
5. Wann nee, firwat ass de Covid-Check-Régime fir den Här Educatiounsminister weiderhi keng Optioun - wëssend, dass soss d' Maskepflicht an de Schoule wäert bestoe bleiwen ?
6. Wéi plangt den Här Educatiounsminister während dem kommende Schouljoer mat deene Kanner am Fondamental ëmzegoen, déi net wëllen respektiv net dierfe getest ginn ?
7. An hirer Pressekonferenz vum 11. August sot d'Madamm Gesondheetsministesch, bei de Schüler tëscht 12 an 18 Joer wiere Schnelltester nach bis Allerhellege geplangt. Wéi soll vun no der Allerhellegevakanz un an där Alterstranche vun de Schüler séchergestallt ginn, dass si net mam Virus infizéiert sinn? Wéi eng Ännerunge si geplangt?

Här President, ech bieden Iech, mäin déifste Respekt unzehuelen.

A handwritten signature in black ink, consisting of several fluid, overlapping strokes that form a stylized, abstract shape.

Martine Hansen

Fraktiounspresidentin

Gemeinsam Äntwert vum Minister fir Educatioun, Kanner a Jugend a vun der Gesondheetsministesch op d'parlamentaresch Fro Nr. 4871 vun der honorabeler Deputéierte Martine Hansen

Ad 1)

Mat der Direction de la Santé ass am Juli zesummen zeréckbehale ginn, fir d'Evolution vun den Infektiounszuelen iwwer de Summer ofzewearden an de 27. August eng Propos fir eventuell Adaptatiounen um sanitäre Konzept fir d'Schoule virzeleeën. Dëst fir sécherzestellen, datt déi sanitär Mesüeren adaptéiert un déi aktuell Situatioun sinn. Den 30. an 31. August si Konsultatiounsgesprécher mat de Schoulpartner virgesinn, deenen hire Feedback wäert mat opgeholl ginn. Wann sech legislativ Adaptatiounen imposéieren, wäerten dës vum Regierungsrat an senger Sëtzung vum 1. September decidéiert ginn.

De sanitären Dispositif wäert awer wäitgeeënd an der Kontinuitéit vun dem besteeënde Stufemodell stoen, deen sech bis elo an der Bekämpfung vun der Pandemie bewäert huet.

Ad 2)

De Stufepang zeechent sech grad doduerch aus, datt en d'Méiglechkeet bitt, fir permanent d'Mesüre fir d'Bekämpfung vum Covid-19 un déi sanitär Situatioun an de Schoulen unzepassen. D'Integratioun vun neie Komponenten an de Stufepang wäerten net ouni eng Decisioun vum Regierungsrat an am Fall vu legislativen Adaptatiounen vun dem Parlament méiglech sinn.

Ad 3)

De Covid-Check ass en Instrument, fir Persounen den Accès zu enger bestëmmter Prestatioun ze erméiglechen ënnert der Viraussetzung, datt si geimpft, getest oder geheelt sinn. Et sinn dobäi zwou Saachen ze bedenken: Zum enge gëllt fir d'Schoul déi allgemeng Schoulpflicht, an zum aneren hunn nach net all déi Jugendlécher tëscht 12 an 18 Joer vun enger kompletter Impffoffer kënne profitéieren. Fir d'Kanner ënner 12 Joer gëtt et nach keen zougeloossenen Impfstoff. Dofir envisagéiert den Educatiounsministère am Moment net d'Applicatioun vum Covid-Check-Regime fir den allgemengen Zougang zu der Educatioun.

Aktuell gëtt awer iwwerpréift, op de Covid-Check-Regime zu engem Element vum Stufepang kéint ginn, deen zum Asaz kënnt, wann et Infektiounen innerhalb vun engem Grupp gëtt.

Ad 4)

D'Äntwert op dës Fro ergëtt sech aus der Äntwert op d'Fro 3. Wann eng Decisioun par rapport zu engem méiglechen Asaz vum Covid-Check-Regime getraff ass, gëtt d'Ëmsetzung mat de jeeweiligen Direktiounen virbereet.

Ad 5) a 6)

Bis elo gouf et bei de Schüler an den Elteren eng grouss Akzeptanz vun de fräiwëllege Mesüeren an och vum Stufepang. Duerfir bleift et bei der Positioun, Elteren a Schüler iwwer den Dispositif opzeklären a si doriwwer ze sensibiliséieren, wei wichteg hir fräiwëlleg Participatioun ass

Ad 7)

D'Situatioun vun der Pandemie gëtt kontinuierlech evaluéiert. Et ass haut ze fréi fir ze decidéieren, wat déi adequat Mesüeren no Allerhellege wieren.